

## Suão Sesus tuktsa bo ziwatahaka

Tubabatu kytsa watahaha — Suão ziwatahaka — mynakaranaha. Suão Sesus tuk zinymyrykyta. — Tynaharape pokzitsikinaha — ana hi ziwatahaka. Aba katsa kino niwatihi tanymyryky.

*Sesus Kiristu Deus harere baba.*

<sup>1</sup> Abaka katsakta ikiahatsa bo tahawatahakanaha. Sesus Kiristu ahabo tawatawy tsihikik iwatsahi tawatahaka. Deus isuknihi byituze Sesus Kiristu koikny baktatu my. Atakta Deus harere babata tu hỹ. Iharere humo tsikspirikpokonaha zeka meky watu tsimoziknaha. Tsimyhyrikosokdanahaze ituk mywahi tsimynapykyryknaha Sesus Kiristu inasikze iharere tsiwabynaha hỹ. Tsinynaha. Ituk zikzurukunaha. Abaka ibo mytsatyziu tsimykaranaha.

<sup>2</sup> Atakta mybarawy bo inasikze mywata niyzik. Iwatsahi katsakta tsinynaha. Ata soho hi tsimytsasokonaha. Asahi ihumo mospirikponahaze meky watu moziknaha. Tsimyhyrikosokdanahaze Deus tuk mywahi tsimynapykyryknaha. Atakta Deus tuk tawahi mynapykyryk. Tubabatu Deus tuk koikny baktatu mybo tawatawy.

<sup>3</sup> Nawa ha ty botu tsinynaha ahabo tsimytsasokonaha. Botu tsiwabynaha hi ahabo tsimytsasokonaha. Tsimytsasokonahaze isoho humo ahahyrinymyrẽtsa. Ikiahatsa mywatsa Deus myzo hyrytsa tsimoziknaha. Katsakta Sesus Kiristu tukytsa tsimaha ikiahatsa kino niwatihi mytuk itukytsa tsimoziknaha. Iwatsahi ahabo tsimytsasokonaha ikiahatsa kino niwatihi mytukytsa tsimoziknaha. Katsakta myzubarẽtsa astsatu tsimoziknaha hỹ.

<sup>4</sup> Anahi tawatahaka iwatsahi ahakurêtsa tsimozik-naha. Ikiyahatsa Sesus humo ahaspirikporêtsa. Katsakta mykurêtsa tsimykaranaha

*Deus haramwe eksok hyrity wa.*

<sup>5</sup> Wabyziutaha! Deus wasania ty ahabo tsimytsasokonaha. Deus haramwe eksok hyrity wa. Atazuba imysapyrênikita. Ihumo mypubara zuba. Katsa mysopyksapybyitsa tu tsimykaranaha zeka batu ituk zikapykyknaha. Amy ty batu mysapy kytsa papatu tsimykaranahaze mysikpybyrêtsa tsimoziknaha. Katsa wasani tsimaha zeka haramwe eksok hyrity wa iwaze Deus tuk tsimypykyryknaha. Anahi Sesus mybo nitsaso katsa iharere tsiwabyanaha. <sup>6</sup>Katsakta:

— O Deus atukytsa tsimaha — mytsaty ahabyitsa tsimykaranaha. Hawaha tsimytsasokonaha zeka mysapybyitsa tu tsimykaranaha mybarapetu tsimykaranaha. Katsa wasanibara ty tsimyzurukunaha. Iwaze batu Deus tuktsa tsimoziknaha. <sup>7</sup> Deus ta batu zimyi batu ziky. Atazuba haramwe eksok hyrity wa. Wasanikita. Katsa iwata tsimyzurukunaha zeka tyharape hapokz-itsikinaha, Deus mysopyksapybyitsa tu tsikykaranaha mymyokzohik. Sesus Deus tse iharapatawyhyta humo taspu ziwebaik nihyrikosokda ana humo hi mysapybyitsa tsikykaranaze Deus mymyokzohik. Abaka Sesus humo meky watu tsimoziknaha. Ihumo mysapyrêtsa tsimozik-naha hỹ.

<sup>8</sup>Katsa tihi zeka:

— Katsakta isapyrênikia ty zuba tsimykaranaha zeka. Deus harere bo zuba hỹ tsimynakaranaha — mybarapetu tsimykaranaha. Batu ma zikaha. Iwa tsimykaranaha zeka mybarapetu tsimykaranaha. Anaharere humo hi baija tsimykaranaha. <sup>9</sup> Mysopyksapybyitsa tsimykaranaha zeka Deus bo tytsasonaha. Iwa mysapybyitsa ty ibo

tsimytsasokonaha zeka iwahatu mymyokzohik. Iwa botu nitsaso iwatahi mysapybyitsa tsimykaranaha iharere humo mymyokzohik. Iharere wasani my. Ihumo meky watu tsimoziknaha. Ihumo mysapyrëtsa tsimoziknaha hỹ. <sup>10</sup> Deus hi:

— Mybarawy ezeiksa simysapybyitsa mykaranaha — niy. Tsimytsasokonaha zeka:

— O katsakta batu. Wasani tsimaha — mybarapetu tsimykaranaha. Iwa mybarapetu tsimykaranaha zeka Deus harere humo batu ahahyrinymyry tsipiwatawykynaha. Deus botu nitsaso mybarawy ezeiksa sisapybyitsa mykaranaha, katsakta ipe tsimaha zeka:

— O batu wasani tsimy — iwatahi Deus mospihik-batakata wata mybarapetu tsimykaranaha.

## 2

*Kiristu mymytsumuêhñekik.*

<sup>1</sup> O myzubaha kahyrytsa watsa ikiahatsa bo piwatahaka iwahatu hawa batu sapybara humo ka batu ahakparawy. Iwaze imysapybara ty ka moewyhiktaha. Ikiyahatsa ahamysapybara ty tsimaha zeka Sesus Kiristu ahatsyhyryze Deus bo mopamykyso. Atahi pahabetesaka Deus myzo babata bo mopamykysoko. Sesus imysapyrënikita my. <sup>2</sup> Ata kino mysapyzekenihyrikosokda. Nihyrikosokdaze mysapyzekeniyzik. Iwatahi Deus mymyokzohik. Mybarawy ezeiksa sizubarëtsa imysapybara ty nikaranaha mysiokzo tsihikik hỹ.

<sup>3</sup> Deus harere bo hỹ tsimykarannahaze itukytsa tsimoziknaha. Iharere bo hỹ tsimykaranaha ana humo hi itukytsa tsimoziknaha. Anahi tsinymyrykynaha. <sup>4</sup> Aty iharere bo hỹ byizeka katsa mype:

— Utakta Deus humo kahyrinymyrêta — mybarapetu nikara. Deus harere wasape nikara iharere wasani zuba ana humo kino batu ma ziky.

<sup>5</sup> Kytsa Deus harere bo hyÿ maha zeka Sesus humo sispirikporêtsa moziknaha. Asa kino Deus humo simypokzitsiukrêtsa anatyhi kytsa bo piwatawynaha. Deus harere bo hyÿ mykaranaha zeka hawa haty Deus mozihikik yhÿ mykaranaha iwa Deus sopyk tanymyry.

<sup>6</sup> Katsakta Deus pe tsimaha:

— O Deus hawa tsimyzihikik ana bo hyÿ — tsimaha. Iwaze hawa Sesus zikzuruku katsa kino niwatihi isopyk watu tsimykaranaha. Sesus watsa tsimyzurukunaha zeka iwaze hawa Deus mozihikik yhÿ tsimykaranaha. Hawa mozihikik ana humo hi myhyrinymyrêtsa hÿ.

*Abaky mypehawy.*

<sup>7</sup> Kaharereziuwytza botu ahabo iktsasoko atsatu ahabo piwatahaka, kaharere ezytyk. Tubabatu myzotsa niak-bakanahatsa botu nitsasonaha hawa ahasopyk. Aba kino atsatu piwatahaka, kaharere ezytyk waha my.

<sup>8</sup> Ana soho hi ahabo piwatahaka. Hawa Sesus zikzuru-riku ikiahatsa kino niwatihi kytsa sopyk anahi tsiny-nahaze ana kino ezytyk waha my. Hawa Kiristu zikzuru-riku naha bo mytsaty tsimykarannahaze ana humo kino myhyrinymyrêtsa. Sesus anaharere bo yhÿ ziknakara, iwatahi myzubaha bo nasisapywyky. Katsa kino niwati-hiktsa! Sesus haramwe eksok wa. Aty iharere bo hyÿ mykaraze maku iwororo waha eze pitabaka tawata Sesus tuk kytsa mysipokzitsiki.

<sup>9</sup> Atahi:

— O uta Deus harere bo hyÿ mykara. Katsy batu kakparawy ihumo kakyrirêta — iwa mybarapetu mykara. Ata kino tatsy humo takyrikize zimyikik iwatahi Deus harere bo batu ma ziky. Maku miwa ha buruk pitabakaze

tawata, tatsy tsiakyriurêta humo. <sup>10</sup> Aty tatsy humo imypokzitsiki Deus harere bo hyÿ mykara. Batu zimyi. Ata kino maku iwororo waha eze pitabaka tawata, tatsy pipokzitsiki humo.

<sup>11</sup> Atahi tatsy humo takyriki iwaze Deus harere bo batu hÿ ziky. Zimyiki. Ata kino maku wata miwa ha buruk pitabaka. Iktsabyitatu miwa humo izarata tawata. Atakta tatsy humo takyriki miwa ha buruk ta wata. Tsiakyriurêta tuze Deus harere bo batu hÿ ziky izarata wata paikpa nikara.

<sup>12</sup> O katukytsa Sesus humo ahaspirikporêtsa iwatsahi botu ahamysopyksapybyri ty tsikykaranaha zahaokzohik.

Sesus Kiristu myzahapokzitsiki mysapyzekenihyrikosokda iwatahi Deus ahamysopyksapybyri ty tsikykaranaha zahaokzohik.

Ana hi ahabo piwatahaka.

<sup>13</sup> O sizotsa ahabo piwatahaka.

Abaka atahi Deus nanabyitaba suknihibyize koikny baktatu ata humo hi tsinynaha,

Sesus Kiristu kino niwatihi tsinynaha.

O siypykyhydytyktsa ahabo kino niwatihi piwatahaka.

Hyrikoso sapybara pehatsa harere bo batu hÿ tsimaha.

Abaka ikiahatsa Deus tuktsa tsimoziknaha.

Kahyrytsa watsa ahabo piwatahaka,

Deus myzo humo botu ahahyrinymyrêtsa.

<sup>14</sup> Sizotsa ahabo piwatahaka atahi Deus nanabyitaba suknihibyize koikny baktatu

ata humo kino ahahyrinymyrêtsa.

Atakta Sesus Kiristu ata kino niwatihi tsa-hahyrinymyrêtsa.

Siypykyhydytyktsa ahabo piwatahaka ahapunihikrêtsa humo.

Deus harere ahatuk, iharere bo zuba mytsaty tsimykaranaha.

Hyrikoso sapybara pehakatsa harere bo batu hỹ tsimaha.

<sup>15</sup> Ikiahatsa Deus sukyrytsitsa batu ahakparawy! Kytsa asahi Deus humo batu siakparawy tsizubarēna mozihikiknaha. Ikiahatsa ja! Ikiahatsa siwatsa tsizubarēna tsimyzihikiknaha zeka Deus myzo batu ahatuk ziknapykyryk.

<sup>16</sup> Kytsa asahi Deus harere bo batu hỹ mykaranaha tsizubarēna mozihikiknaha. Tahanamy bo zuba mytsaty mykaranaha. Amy bo iktsa maha zeka ana kino mozi-hikiknaha. Asa hi:

— O katsa zuba mynamy tsizubarēna. Iwatsahi myhyrizikwanitsa tsimoziknaha — mykaranaha. Kytsa sibo iktsa maha mozihikiknaha. Ikiahatsa siwatsa ahasopyk zeka Deus humo batu ahaspirikpo.

<sup>17</sup> Aibani sinamy mohokdaba. Kytsa sinamy zuba mozihikiknaha bykyze sinamybyitsa moziknaha. Deus harere bo hyỹ tynakaranahaktsa iwaze Deus tuk tahawahi mynapykyryknaha hỹ.

*Sesus Kiristu sukyrytsitsa.*

<sup>18</sup> O katukytsa tsizubarēna mopykbaze Satanas mozumu. Atakta Sesus batu iakparawy, isoho botu tsiwabynaha. Atahi sisukyrytsa. Sizubarētsa Sesus Kiristu sukyrytsitsa botu zumunaha, iwatsahi nanabyitaba mopykbaze ana humo hi myhyrinymyrētsa. <sup>19</sup> Asahi Kiristu humo batu siakparawy mysapy ekze zipokonaha. Sesus tuktsa iwatsahi mytukytsa watsa nikaranaha. Nitsasonahaze:

— Katsaktsa ahaututsa pauktsitsa tsimykaranaha — mybarapetu nikaranaha. Mytutsa pauktsitsa babatsa zeka ba zikponaha. Ziponahaze myututsa pauktsitsa byitsa tu iwa ziwatawynaha.

<sup>20</sup> Ikiahatsa hi nawa ha ty wasani ahahyrinymyrëtsa. Deus hyrikoso ahatuk mynapykyryk iwatsahi nawa ha ty wasani ahahumo tsahahyrinymyrëtsa. <sup>21</sup> Iwatahi aha bo piwatahaka. Asahi sispihikbatakatsitsa batu wasape zikaha, sihyrinymyrybyitsa bo batu tywataha. Ikiahatsa hi ahahyrinymyrëtsa iwatahi ahabo piwatahaka.

<sup>22</sup> Kytsa simyspihikbatanikitsitsa tihi:

— O Deus Sesus ty batu tpeha. Sesus Deus tse byitatu. Deus Sesus zo byitatu — mykaranaha. Iwaze nitsasokonaha asahi Sesus Kiristu humo batu siakparawy. <sup>23</sup> Aty:

— O Sesus Deus tse ana humo hi batu spirikpo mykara — iwa my zeka atakta batu Deus humo ispirikpo. Atahi:

— O Sesus Deus tse babata — mykara. Atahi Deus humo tispirikporëta.

<sup>24</sup> Deus wasania ty botu tsiwabynaha. Deus humo tsikspirikponahaze iharere bo hyÿ tsimykaranaha. Iharere bo hyÿ tynakaranahaktsa! Iharere bo hyÿ tsimykaranaha zeka hawa Deus mozihihikik yhÿ tsimykaranaha. Sesus tuk tsimynapykyryknaha. <sup>25</sup> Kiristu botu mype niy:

— Kahumo meky watu tsimoziknahaktsa kytsa! Iwahu tsimyhyrikosokdanahaze Deus tuk mywahi tsimynapykyryknaha hÿ — niy.

<sup>26</sup> Asaktsa Sesus humo batu sispirikpo mybarapetu ahabo sisopyk. Iwatahi ahabo piwatahaka sihumo pykyhytuty iwatahi piwatahaka. <sup>27</sup> Deus hyrikoso ahatuk mynapykyryk. Batu ikiahatsa zubabyitsa Kiristu Deus hyrikoso ahabo zipeha. Deus hyrikoso atahi pahahyrinymyry babata. Wasani haty pahahyrinymyry. Ahape my:

— Sesus harere bo hyÿ tynakaranahaktsa! — my. Atahi batu mybarapetu isopyk. Iharere bo hyÿ tsimaha zeka Sesus tuk tsimynapykyryknaha hÿ.

*Katsaksa Deus hyrytsa.*

<sup>28</sup> — O katukytsa Kiristu harere bo hyÿ tahaktsa. Iwa zeka hawa ahasopyk zeka batu ahasikpyby. Sesus myziksizoze batu ahasikpyby iwaze ahapunihikrëtsa tsi-moziknaha hÿ. <sup>29</sup> Deus wasani mykara ana humo hi ahahyrinymyrëtsa. Asaktsa wasani mykaranaha. Deus harere bo hyÿ mykaranaha Deus hyrytsa moziknaha. Ana soho bo hi mytsaty tsimykaranaha.

**3**

<sup>1</sup> Deus myzo myhumo tsimypokzitsiarëta. Iwatahi mype my:

— Asahi kahyrytsa — my. Katsaksa Sesus tukytsa tsimaha. Ana humo hi mytsaty tahaktsa! Iwaze kytsa Deus humo batu siakparawy katsa Deus hyrytsa ana humo hi batu sihyrinymyry. Sesus Deus tse babata ana humo sihyrinymyrybyitsa iwatsahi katsa Deus hyrytsa niwatihi batu sihyrinymyry.

<sup>2</sup> O katukytsa katsaksa botu Deus hyrytsa tsimaha. Aibani Deus tuk mywahi tsimynapykyryknaha. Iwaze hawa tsimaha. Batu mynyhy. Kiristu myziksizoze katsaksa ihyrytywa tsi-moziknaha ana humo hi myhyrinymyrëtsa. Hawa Kiristu mykara myhyrinymyrëtsa ibo tsimykozonahaze myhyrinymyrëtsa babatsa. <sup>3</sup> Katsaksa Kiristu wata tsi-moziknaha ana humo hi mytsaty tahaktsa. Iwatsahi tahasapywykynaha iwaze Kiristu wata tsimaha. Kiristu imysapyrënikita, batu amy tohi. Katsa mysopyksapybyitsa tu tsimykaranaha zeka ihumo batu mykparawy.

<sup>4</sup> Asahi pisapybyikinaha zeka Deus harere bo batu hÿ zikaha. Asaktsa simysopyksapybyitsa mykaranaha zeka



Deus harere humo batu hyĩ zikaha. <sup>5</sup> Sesus zuba tsimysapyrëta. Zumuze mybarawy ezektsa bo mysapybyitsa tsimykaranaha iwatatu nimyokzohik. Ihumo zuba mysapybyitsa tsimykaranaha ana hi tsimoewyhiknaha. Sesus zuba Deus harere bo hyĩ mynakara. <sup>6</sup> Aty Kiristu harere bo hyĩ mykara imysapybara ty pimoewyhik. Pisapywyky iwa Deus mozihikik anahumo hyĩ mykara. Imysopyksapybyri mykara zeka Sesus humo batu ispirikpo. Sesus humo batu ihyrinomyry.

<sup>7</sup> Katukytsa pykyhytutaha! Asaktsa Sesus humo batu sispirikpo ikiahatsa pahamyiwy tsihikiknaha iwatsahi pahapihikbatakanaha. Siharere bo ka waby waby byitaha! Asaktsa wasani sisopyk Deus okzeka wasani mykaranaha. Asahi Deus okzeka Kiristu watsa wasani mykaranaha. <sup>8</sup> Kytsa simysapybyitsa ziknakaranaha asaktsa hyrikoso sapybara pehaktsa Satanas hyrytsa. Tapara Deus bi-joikpe mybarawy nizuknize Satanas Deus harere bo batu hĩ niy. Deus tse babata mybarawy ezektsa bo inasikze Satanas zikwy zipykbaik iwaha bo hi Sesus inasik.

<sup>9</sup> Katsa Deus hyrytsa tuze mysopyksapybyri humo batu mymyzihik. Deus myzo hyrikoso mytuk mynapykyrykyk iwatsahi mysapybyitsa tsimykaranaha batu zikaha. <sup>10</sup> Aty Deus tse zeka sihumo myhyrinomyrëtsa. Aty Satanas tse zeka sihumo myhyrinomyrëtsa. Asahi wasanibyitsa sisopyk Deus hyrytsa byitsa tu maha. Asahi itukytsa tuk tahakyrikinaha batu Deus hyrytsabyitsa tu maha ihumo sispirikpobyitsa. Deus hyrytsa ihumo sispirikporëtsa zeka iwatsahi taharapepokzitsikinaha.

*Tyharape pokzitsikinahaktsa kytsa.*

<sup>11</sup> Tyharape pokzitsikinahaktsa! Sesus humo tsikspirikpokonahaze ana harere tsiwabynaha. Tynaharape pokzitsikinahaktsa kytsa.

<sup>12</sup> Kaĩ waka ta byita ja. Atahi hyrikoso sapybara pehakatsa Satanas tse niy. Imysopyksapybyita nikara. Atahi tatsy zibezehek. Tatsy humo takyriki iwatahi tatsy zibeze. Itsykta wasania ty ziknakara atakta batu, imysopyksapybyiri ty ziknakara. Itsy wasani ziknakara iwatahi ihumo tsizokdirêta nikara. Iwa byita ja.

<sup>13</sup> O katukytsa, Sesus humo sispirikpobyitsa ahahumo takyrikinaha zeka ahapyby byihuja. <sup>14</sup> Asa watsa byijataha asahi sinini ykarawy bo Deus mysipeha. Katsaktsa meky watu tsimoziknaha. Mytukytsa humo mymypokzitsirêtsa. Iwatsahi batu sinini ykarawy bo tsimaha. Asaktsa ustsya mysisapybyrikinaha zeka sinini ykarawy bo maha. Asawatsa byijataha!

<sup>15</sup> Usta bo tsipisapybyrikinaha zeka mybakatsa watsa. Deus okzeka atahi tatukytsa humo takyriki mybakatsa watsa. Atahi imysopyksapybyita tu nikara batu tymoewy. Atakta Deus tuk ba mynapykyryk ana humo hi ahahyrinymyrêtsa.

<sup>16</sup> Kiristu nimyhyrinymyryky tyharape pokzitsikinhaktsa. Atahi mysapyzekenihyrikosokda. Mysapyzekeniyzik. Katsa kino niwatihiktsa tsimaha! Aty usta Sesus tukta pibeze tsihikik zeka katsa ipe tsimaha:

— O isapyzekenimoziknaha ipokzi tsimhyrikosodanaha — tsimaha. Iwa Kiristu nimypehaka.

<sup>17</sup> Aparakbaha Sesus tuktsa sinamybyitsa zeka mynamy ty sibo nyny tsimaha! Sibo tybiak byizeka soso byitaha:

— O katsaktsa Deus humo mypokzitsirêtsa — ba zikaha iwa zeka mybarapetu tsimykaranaha.

<sup>18</sup> Katukytsa ustsya Sesus tuktsa tysitsumuêhînaha. Sihumo amypokzitsi zeka ahanamy ty sibo nyny tsimaha. Ahanamy tsibiaknaha. Tysisapywykynaha. Iwaze sihumo ahamypokzitsiukrêtsa tsimaha hỹ.

*Deus okzeka mypunihikrētsa tsimoziknaha.*

<sup>19</sup> Myzubaha bo tsimysisapywykynaha zeka iwa Deus mozihikik hyỹ tsimykaranaha. Ana soho humo hi myhyrinymyrētsa. Iwaze Deus bo batu tyso:

— Utakta amy ty akparawy yhỹ ja. Aharere baba ty yhỹ ja — iwa batu tyso. Myzubaha humo ahamypokzitsi zeka iwatsahi Deus okzeka batu ahapyby. <sup>20</sup> Tsipimyikinaha zeka mytsatyziu tynakaranaha:

— O abaka kamysapybyita tu mykara hawa my — tsimaha. Ahapyby byihuja Deus tsihyrinymyryrēta babata mymysapywyky iwaze batu ahapyby. <sup>21</sup> Katukytsa imysapybara ty tsimykaranaha ana soho humo hi mytsaty mytsaty byijataha iwaze Deus okzeka batu mypyby. Mypunihikrētsa tsimoziknaha. Deus bo tsimypamykysonahaze mykurētsa tsimozikzonaha. Iwaze imysapybara humo ka mytsaty mytsaty byijataha.

<sup>22</sup> Amy ty ibo tsimyzapykykynaha ana humo hi mybo nyny mykara. Iharere bo ma tsimykaranaha. Iwaze hawa Deus mozihikik naha humo mysopyk iwatsahi amy ty tsimyzapykykynaha mybo nyny mykara. Iwatahi namywabyky. <sup>23</sup> Deus mype:

— Ikiatsa Sesus humo ahaspirikpohuktsa! Tynaharape pokzitsikiknahaktsa! — niy. Iwa Deus mybo nitsasoko. Atsatu Sesus botu zahahyrinymyryky. <sup>24</sup> Asaktsa Deus harere bo hyỹ mykaranaha ihumo mozihikiknaha sisopyk. Asa kino ihyrytsa maha. Sibō tysisapywyky sihumo tsimypokzitsiukrēta. Deus hyrikoso ihyrytsa tuk tawahi mynapykyryk. Iwaze Deus mymysapywyky, ihyrikoso mytuk tawahi mynapykyryk.

## 4

*Deus hyrikoso wasanita mekywatuta isopykta.*

<sup>1</sup> O kaharereziuwysitsa nanabyitaba kytsa mybo mybarapetu mynakaranaha. Iwatsahi siharere humo batu hỹ. Ahamytsatyhaĩrẽtsa. Atahi:

— Utakta Deus hyrikoso humo pinymyryky — my. Ahamytsatyhaĩrẽtsa. Tapara wabyziutaha! Ikiahatsa zuba tsimypamykysokonaha:

— O ihyrinymyrywy wasani ja Iwaha ja. Deus nitsasoko — tsimaha.

<sup>2</sup> Deus harere baba humo nitsasokoze tsinymyrykynaha. Asahi Deus harere mymyhyrinymyrynahaze mype mykaranaha:

— Deus Sesus zipehata my. Mybarawy inasikze maku niyzik — mykaranaha. Zikino Deus sohokotsa piwatawykynaha. Deus hyrikoso situk mynapykyryk.

<sup>3</sup> Utsa Sesus Kiristu soho mekytu motsasokoronaha asahi batu Deus harere ty tyso. Asaktsa:

— Deus Sesus ty mybarawy bo batu ty peha. Batu maku yzik — mykaranaha. Asatu tahyrinymyrykynaha. Deus hyrikoso situk ba zikapykyk. Asa kino Sesus bo batu siakparawy, Sesus sukyrytsitsa ana humo kino mymyhyrinymyrykynaha. Botu tsiwabynaha, atakta Sesus bo batu iakparawy isukyryhyta hyrikoso mozumu. Atahi botu izumu.

<sup>4</sup> Katukytsa ikiahatsa hi Deus hyrytsa tsimaha. Atakta Sesus humo batu iakparawy, sisukyrytsitsa moziknaha atakta hyrikoso sapybara pehakatsa ata humo hi kytsa Sesus humo batu sispirikpo. Asahi Sesus sukyrytsitsa Satanas harere bo hyỹ mykaranaha. Deus hyrikoso ahatuk mynapykyrykta abazuba tsipunihikrẽta hỹ ba hawa tohi zikzukninaha. Iwatsahi Deus sohobyitsa harere nepyknaha. Sizikwy mohokda.

<sup>5</sup> Asahi Deus sohobyitsa kytsa Sesus humo batu sispirikpo asahi sinamy soho zuba mopamykysokonaha.

Deus hyrikoso situk ba mynapykyryk iwaze kytsa Deus bo batu siakparawy siharere piwaby tsihikiknaha.

<sup>6</sup> Katsa hiba Deus hyrytsa tsimaha. Kytsa Sesus humo sispirikporëtsa myharere piwabyziukunaha. Kytsa Deus harere bo batu hỹ mykaranaha myharere humo kino niwatihi batu siakparawy. Iwatsahi aty Deus harere baba ty mymyhyrinymyrykynaha mytsatyziu tynakaranahaktsa. Asahi mymyitsa, wasanibyitsa mykaranaha asa humo kino batu hỹ tsimaha.

*Deus myhumo tsimypokzitsiarëta* iwatsahi tyharape pokzitsikinahaktsa!

<sup>7</sup> — O kaharereziuwysitsa tyharape pokzitsikinahaktsa! Sesus tuktsa bo tysisapywykynaha zeka hawa Deus mozihikik ana bo hi yhỹ tsimykaranaha. Katsa tsimyarape pokzitsikinaha zeka Deus hyrytsa babatsa tsi-moziknaha. Sesus tukytsa tsimaha. Iwaze Deus harere bo hyỹ tsimykaranaha.

<sup>8</sup> Deus myzubaha humo tsimypokzitsiukrëta. Ata zuba sizubarëtsa humo mysipokzitsi tsihikik. Iwatahi aty ustsaha humo ka imypokzitsiu byizeka Deus tukytsa byitsa tu. <sup>9</sup> Deus myhumo tsimypokzitsiukrëta ana humo hi botu myhyrinymyrëtsa. Deus tatse zipaha atahi itse babata. Mybarawy ezektsa bo tatse zipehaze myhumo tsimypokzitsiukrëta ziwatawy. Sesus mysapyzekenihyrikosokda iwaze tazo bo mymyoktyhyryk. Iwa Deus myhumo tsimypokzitsiukrëta myhyrinymyrëtsa hỹ.

<sup>10</sup> Tubabatu katsa Deus humo batu mykparawy Deus zuba myhumo tsimypokzitsiukrëta. Iwaze mybo tatse zipaha. Katsa mysopyksapybyitsa tsikykaranaha ihumo mymyokzohik. Atahi mysapyzekenihyrikosokdaze mysapybyi tsikykaranaha Deus Sesus humo mymyokzohik.

Iwaze tsimyhyrikosokdanaha zeka Deus tuk mywahi tsimynapykyrykna.

<sup>11</sup> O katukytsa Deus myhumo tsimypokzitsiukrëta zeka iwatsahi tyharape pokzitsikinahaktsa tsimaha. <sup>12</sup> Batu aty tohi Deus ty ityny. Tsinaharapepokzitsikinaha zeka Deus mytuk mynapykyryk. Iharere bo hyÿ tsimykarannahaze ustsá bo tsimysisapywykynaha. Iwatsahi Deus zikwy mytuku myhyrinymyrëtsa hÿ.

<sup>13</sup> Deus hyrikoso mybo zipegahik. Ihyrikoso hi mytuk mynapykyryk. Iwatsahi hawa Deus mozihikik ihyrikoso humo yhÿ tsimykarannaha. Ihyrikoso mytukze iharere bo hyÿ tsimykarannaha. Ihyrikoso kino myhumo tsimypokzitsiukrëta. <sup>14</sup> Deus tatse babata zipaha. Mybarawy ezektsa bo zipaha iwatahi inasikze myzubarëtsa Deus bo mymyokty tsihikik. Hawa Sesus nikara ana bo hi iktsa tsikaha. Iwatsahi Sesus Deus bo mymyoktyhyrykta ana hi myzubaha bo tsimytsasokonaha. <sup>15</sup> Aty my zeka:

“O Sesus Deus tse babata tihi my” — niy. Isikpybybyita tu Sesus Deus tse motsasoko iwaze Deus ituk mynapykyryk. Atahi hawa Deus mozihikik yhÿ mynakara. <sup>16</sup> Deus tatse zipaha atahi katsa tazo bo mymyoktyhyryk. Iwatsahi myhumo tsimypokzitsiukrëta myhyrinymyrëtsa. Iwatsahi katsa tihi:

— O Deus myhumo tsamypokzitsiukrëta — tsimaha. Iwaze sizubarëtsa bo tsimytsasokonaha:

— O Deus myzubaha humo tsimypokzitsiukrëta — tsimaha. Kytsa humo tsipisapywykynaha zeka hawa Deus mozihikik ana ty hi yhÿ tsimaha. Deus kino myhumo tsimypokzitsiukrëta. <sup>17</sup> Sizubarëtsa bo tsimysisapywykynaha zeka mypunihikrëtsa tsimoziknaha. Deus simysapybyitsa tu nikaranahatsa boze tihi:

— Kaokzeka ikiahatsa ahamysapybyitsa tsikykaranaha. Katse ahasapyzeky nihyrikosokda iwatahi ihumo pa-haokzohik — my. Iwatsahi motsasokoze katsakta batu mysikpyby. Katsakta iokzeka mypunihikrëtsa tsimaha. Kytsa bo tsimysisapywykynahaze mypunihikrëtsa tsi-moziknaha. Katsa Kiristu watsa mysopyk zeka iwatsahi ihumo batu mysikpyby.

<sup>18</sup> Deus myhumo tsimypokzitsiukrëta ana humo hi tsimyspirikponaha zeka batu mypyby. Mypybybyitsa tu zeka kytsa tsimysisapywykynaha iwatsahi mypuni-hikrëtsa tsimaha. Mypybyrëtsa zeka katsakta:

— Deus myhumo tsimypokzitsiukrëta ja. Mysapybyitsa tu tsimykaranaha mymyokzo ja — tsimaha. Iwa tamyiba zeka mypybyrëtsa tsi-moziknaha. Mypybyrëtsa tu zeka ustsaha humo ba ziksipokzitsi.

<sup>19</sup> Taparaka Deus myhumo tsimypokzitsiukrëta. Abaka katsakta Deus humo mymypokzitsirëtsa. Ihumo ustsaha bo tahapokzitsikinaha hÿ. <sup>20</sup> Katsakta ustsaha Sesus tuktsaha humo tahakyrikinaha zeka Deus harere bo batu hÿ tsimykaranaha. Kytsa humo ahamypokzitsi byizeka ba ziktsasonaha:

— O Deus ahumo mymypokzitsirëtsa — mybarapetu tsimykaranaha. Batu aty tohi Deus ty tyny. Kytsa bo iktsaha ziknakaranaha. Mytuktsaha bo iktsaha tsimykaranaha, sihumo tsimypokzitsibyinhaha zeka Deus humo kino ni-watihi ba zikmpokzitsi. Deus humo mymypokzitsiby-itsaha babatsaha ata kino batu iktsaha ziky. Iwatsahi batu ihumo mymypokzitsi mytsaty ahabyitsaha tsimykaranaha. <sup>21</sup> Kiristu botu nimyhyrinmyryky:

— Ikiahatsaha Deus humo ahapokzitsirëtsaha zeka ty-harape pokzitsikinahaktsaha! — niy. Iwa Kiristu nimyhyrinmyryky.

## 5

*Sesus tuktsa sispirikpobyitsa harere humo nepykna.*

<sup>1</sup> Kyze asaktsa Deus Sesus zipehata humo mospirikpokonaha asahi Deus hyrytsa maha. Sesus Deus tse ana hi motsasokonahaze Sesus tukytsa moziknaha. <sup>2</sup> Myzo tapokzitsi zeka ihyrytsa kino niwatihi tahapokzitsikinaha. Deus humo tsimypokzitsikinaha zeka iharere bo zuba hyỹ tsimykaranaha. Iwa tyharape pokzitsikinaha hỹ tsimykaranaha. <sup>3</sup> Deus humo tsimypokzitsikinahaze iharere bo hyỹ tsimykaranaha. Iwa ihumo tsimypokzitsirëtsa hỹ. Batu iharere ihokdaha iwatsahi iharere bo hyỹ tsimykaranaha.

<sup>4</sup> Asaktsa Sesus humo batu sispirikpo Deus hyrytsa humo sizikwy nepykba. Katsaktsa Sesus humo myspirikporëtsa botu sizikwy myhumo nepyk. Sesus zikwy mytuk mynapykyryk iwatsahi batu sipunihik. <sup>5</sup> Kytsa Sesus Deus tse humo sispirikporëtsa asa zuba sispirikpobyitsa zikwy nepykbaik iwa hỹ.

*Asahi Sesus Kiristu Deus tse babata piwatawynaha.*

<sup>6</sup> Deus Sesus zipeha. Mybarawy ezektsa bo inasikze Deus harere bo hyỹ ziknakara. Iwaze Suão Sesus pihik ty ziharasusuze. Aiba eze zuba iharapatawyhyta humo tabezewy mysapyzekenihyrikosokda iwahatu katsa Deus tuk mywahi tsimynapykyryknaha. Nihyrikosokdaze Deus zipehata nikara. Abaka Deus zipehata mynakara. Tawahi Deus zipehata mynakara. <sup>7-8</sup> Sesus nimyhyrinymyryky:

— Utakta Deus tse — nikara. Mytsaty tsimykarannahaze hawa niy ta ziharasusuhik. Mytsaty tsimykarannahaze hawa mysapyzekenihyrikosokda atahi Deus tse babata humo myhyrinymyrëtsa. Deus hyrikoso kino niwatihi mymyhyrinymyryky:



— Sesus Deus tse — my. Atahi wasania ty zuba mynatsasoko. Iwatsahi harakykbyi myspirikpowy Sesus Deus tse babata mykaranaha iwatsahi myhyrinymyrëtsa. <sup>9</sup> Maku harere humo tsikspirikponaha. Deus imysapyrënikita iwaze iharere humo tsikspirikpobanaha hỹ. Abaka aty mybo nitsasoko Sesus Deus tse ata kino Deus tihi my. Iwatahi iharere wasani hỹ. <sup>10</sup> Deus hi tatse soho nitsasoko. Asahi Sesus humo sispirikporëtsa:

— O Deus tse Sesus humo kaspirikporëta wasani myhỹ — maha. Sispirikpobyitsa:

— Amy ty Deus tatse soho nitsasoko batu kaspirikpo, iharere bo batu hỹ — maha. Iwa motsasokonahaze Deus imyspihikbatanikita wata mykaranaha. Simysapybyitsa tu iharere humo batu sispirikpo iwatsahi Deus imyspihikbatanikita motsasokonaha. <sup>11</sup> Deus harere bo wabyziutaha! Deus:

— Katse ahasapyzeken nihyrikosokda anahumo hi mekywa tu tsimyzurukunaha! Sesus tuk tsimyzurukunahaktsa! Tsimyhyrikosokdanahaze katuk ahawahi tsimynapykyryknaha — niy.

<sup>12</sup> Asahi Deus tse humo sispirikporëtsa meky watu moziknaha. Sesus tuk mozurukunaha. Myhyrikosokdanahaze Deus tuk tahawahi mynapykyryknaha. Sispirikpobyitsa batu. Sesus zikwy situk ba zikapykyryk mohyrikosokdanahaze batu Deus tuk zikapykyryknaha. Nokponi mynapykyryknaha sinini ykarawy bo tahasapynaha.

*Asaktsa mohyrikosokdanahaze tahawahi Deus tuk mynapykyryknaha.*

<sup>13</sup> Ahabo ziwatahaka. Ikiahatsa Deus tse humo ahaspirikporëtsa iwaze meky watu tsimoziknaha. Sesus tuk tsimyzurukunaha. Tsimyhyrikosokdanahaze ahawahi Deus tuk tsimynapykyryknaha hỹ. Iwatahi

ahabo piwatahaka. <sup>14</sup> Kyze katsaktsa Deus bo tsimypamykysokonaha. Deus bo tsimyzapykykynaha zeka hawa Deus mozihikik iwaze myharere piwaby. Iwatsahi mypunihikrëtsa tsimoziknaha nawa ibo tsimyzapykykynaha. <sup>15</sup> Myhyrinymyrëtsa tu myharere piwaby zeka amy ty tasapyky zeka Deus mybo nyny my. Amy ty mozihikik naha zuba ibo tasapyky zeka iwaze mybo nyny myhỹ.

<sup>16-17</sup> Aty mytukytsa tuk isopyksapybyi mykara zeka iki-ahatsa itsyhyryze Deus bo tsimypamykysokonaha. Deus sisopyksapybyi mysiokzohik iwaze Deus tuk tawahi mynapykyryk. Myzubarëtsa tamyikik. Atakta Deus okzeka batu imysapy ihyrikoso pimiyjanaha zeka atahi ba iokzohok iwaze itsyhyryze Deus bo ba zikpamykyso. Atakta sinini ykarawy bo Deus pipeha. Nokponi Deus bara botu sinini ykarawy bo tasapy.

<sup>18</sup> Deus hyrytsa imysapybara humo ba hỹzo zikaha. Deus tse sihumo tsimypokzitsiukrëta tu iwatsahi sisopyksapybyitsa tu batu hỹ mykaranaha. Satanas sihumo batu ziky Deus tse sihumo tsimypokzitsiukrëta hỹ.

<sup>19</sup> Katsaktsa Deus hyrytsa tsimaha. Deus zikwy mytuk mynapykyryk iwatsahi myhyrinymyrëtsa. Utsa mybarawy ezekeza pykyhytu zikahabyikitsa Satanas zikwy situk mynapykyryk iwatsahi sispirikpobyitsa mynakaranaha.

<sup>20</sup> Deus tse inasik. Botu mybarawy bo izumu ana humo hi myhyrinymyrëtsa. Deus soho humo nimyhyrinymyryky. Hawa Deus mykaraze nimyhyrinymyry iwaze Deus babata humo nimyhyrinymyryky. Ata zuba wasani mykara. Ata zuba isopyksapyrënikita. Ata soho humo hi tsipinymyrykynaha. Sesus humo mspirikporëtsa. Sesus Deus tse humo tsimyspirikpokonaha zeka Deus humo myhyrinymyrëtsa. Iharere bo zuba hyỹ

tsimykaranaha iwaze meky watu tsimoziknaha. Ata zuba Deus babata. Aty iharere bo hyĩ mykara mekywa tu mozik. Mohyrikosokdaze Deus tuk tawahi mynapykyryk hỹ.

<sup>21</sup> Kahyrytsa pykyhytutaha! Deusbyitsa harere bo ka yhỹ byitaha kytsa Deus soho pimyinaha zeka iwatsahi pykyhytutaha!

Suã

## **Deus Harere Aibaky Sesus mymyspirikpoko naha New Testament in Rikbaktsa (BR:rkb:Rikbaktsa)**

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Rikbaktsa

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

